



Sofia Geisler  
Inatsisartunut ilaasortaq, Inuit Ataqatigiit

**Inuit pisinnaatitaaffii pillugit § 37 naapertorlugu apeqqutinut, 113/2019-imiittunut, akissutit**

07-03-2019  
Suliap nr. 2019 - 5405  
Allakkat nr. 10132791

Asasara Sofia Geisler,

Postboks 1029  
3900 Nuuk  
Oqarsasuaat : +299 34 50  
00  
Email: [ikin@nanoq.gl](mailto:ikin@nanoq.gl)  
[www.nanoq.gl](http://www.nanoq.gl)

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissuteqarfigissavakka.

**Inuit Pisinnaatitaaffiinut Kalaallit Nunaata Siunnersuisoqatigiivi kiisalu Inuit Pisinnaatitaaffiinut Instituti innersuussuteqarput arlalinnik meeqqat atuarfiannut ilinniarnermullu aamma tunngasunik, taakkulu "Kalaallit Nunaanni Inuit Pisinnaatitaaffii, Killiffik 2016"-mi atuarneqarsinnaapput.**

**-Innersuussutit uani**

[https://menneskeret.dk/sites/menneskeret.dk/files/media/dokumenter/udgivelser/status/2015-16/groenland/statusrapport\\_2016\\_gl\\_version\\_isbn.pdf](https://menneskeret.dk/sites/menneskeret.dk/files/media/dokumenter/udgivelser/status/2015-16/groenland/statusrapport_2016_gl_version_isbn.pdf)  
allanneqarsimasut ataanilu quppernerna allassimasut suliarineqarnerat sumut killippa?

- Qupperneq 150
- Qupperneq 152
- Qupperneq 155
- Qupperneq 157
- Qupperneq 166
- Qupperneq 168

**Apeqqut 1:** Qupperneq 150: *Ilinniartitaanermut periusissiassap tulliuuttup naleqartitatigut tunngaviini inuttut pisinnaatitaaffiit ilanngutissagaat.*

**Akissut:** Naalakkersuisut ukiuni kingullerni marlussunni Kalaallit Nunaanni ilinniartitaanermut annertunerusumik peqataasoqalernissaa naligiinnerusumillu ilannguttoqarsinnaanera siunnerfigalugit suliaqarput. Taamatut sulineq ingerlaqqissaaq soorunalumi aammattaaq ilinniartitaanermut ilioriusissanngortussani takuneqarsinnaassalluni.

**Apeqqut 2:** Qupperneq 150: *Siunissami ilinniartitaanermut pilersaarusiassani inuttut pisinnaatitaaffiit atuartitsissutigineqartarnissaannut anguniakkat ilanngutissagaat*

*taamaalillutillu nunap nammineq iluani ilinniartitaanerit ilaanni naleqquttuni inuttut pisinnaatitaaffiit atuartitsissutigineqarnissaannut iliuusissatut pilersaarussiaq aallartillugu.*

**Akissut:** Inuit pisinnaatitaaffiisa ilinniartitsissutigineqarnerat ullumikkut meeqqat atuarfiini ilinniarnertuunngorniarfinnilu aalajangersimasumik ilaareerpoq. Tassami inuit pisinnaatitaaffiisa ilinniartitsissutigineqarnerat ilisimaneqarnerallu meeqqanut tamanut atuutereerpoq. Ilinniarnertuunngorniarfinni ilinniartitaanermi inuit pisinnaatitaaffii ilaatigut ilinniagassami Inuiaqatigiilerinermi C-mik qaffasissusilimmi pingaarnertut sammisassat ilagaat. Ilinniagassaq ilinniartunut tamanut pinngitsoorani pisussaaffiuvoq. Meeqqat atuarfiini inuit pisinnaatitaaffii pingaartumillu meeqqat piginnaatitaaffii aammattaaq ilinniagassani Eqqarsaqqissaarnermi ileqqorissaarnermilu ilinniartitaanermut aalajangersimasumik ilaapput.

**Apeqquut 3:** *Qupperneq 152. Inuttut pisinnaatitaaffiit pillugit misissueqqissaarneq pilersissagaat, tamatumani ilanngullugit meeqqat pisinnaatitaaffii, meeqqat atuarfianni alloriarfinni faginilu naleqquttuni, pitsaasumik atuartitsinissaq qularnaarniarlugu.*

**Akissut:** Inuit pisinnaatitaaffiisa, taamatuttooq meeqqat piginnaatitaaffiisa, ilinniartitsissutigineqarnerat naliliisarluni misissuiffigineqarnikuunngilaq. Maannakkuugallartoq taamatut naliliisarluni misissuisoqarnissaanik pilersaaruteqartoqanngilaq.

**Apeqquut 4:** *Qupperneq 152. Isumaliutigissagaat Meeqqat atuarfiannut inatsimmi anguniakkanut paragrafini inuttut pisinnaatitaaffiit innersuussutigineqarnissaat, soorlu toqqaannartumik inuttut pisinnaatitaaffiisa imaluunniit Naalagaaffiit Peqatigiit Meeqqat pillugit isumaqatigiissutaasa innersuussutigineqarnissigut.*

**Akissut:** Meeqqat atuarfiat pillugu inatsimmi atuuttumi siunertanut paragraffimi immikkut inuit pisinnaatitaaffii imaluunniit Naalagaaffiit Peqatigiit meeqqat pillugit isumaqatigiissutaat innersuussutigineqanngillat. Inatsimmut oqaaseqaatini takuneqarsinnaavoq siunertanut paragraffi tamakkerluni Naalagaaffiit Peqatigiit meeqqat pisinnaatitaaffii pillugit isumaqatigiissutaanni allakkiaq 29-mik tunngaveqartoq. Maannakkuugallartoq meeqqat atuarfiannut siunertanut paragraffip allanngortinneqarnissaa eqqarsaatigineqanngilaq.

**Apeqquut 5:** *Qupperneq 152. Isumaliutigissagaat ilinniartitsisut pilersaarutaannik meeqqallu atuarfianni najoqqutassanik nutarsaanissaq, taamaalilluni anguniakkanik aqutsineq ataatsimoortilerlugu, pissutsinut naleqqussarlugu aammalu inuttut pisinnaatitaaffiit meeqqallu pisinnaatitaaffii pillugit aalajangersakkanut atuuttunut naleqquttunngortillugu.*

**Akissut:** Ilinniagassanut inuiaqatigiilerinermut, upperisarsionermut eqqarsaqqissaarnermullu taamatullu ineriartornermut ilinniagassanut pilersaarutini

ilinniarnikkullu anguniagassani takuneqarsinnaavoq inuit pisinnaatitaaffiik taamatullu meeqqat pisinnaatitaaffiik suliaqartoqartassasoq.

Meeqqat atuarianni nalinginnaasumik immikkoortitaluni ilinniarnikkut anguniagassaqaqtitsisarneq ileqqorineqanngimmat aammattaaq sammisassanut inuit pisinnaatitaaffiitut meeqqallu pisinnaatitaaffiitut atuuppoq ilinniagassanik ataasiakkaanik ilinniartitsisut namminneq aalajangertassagaat atortussat suut aallaavigalugit qanorlu annertutigisumik ilinniarnikkut anguniagassani ilinniartitsisoqartassanersoq. Ilinniartitsineq aaqqissuunneqartarpoq ingerlanneqartarlunilu tamatigut atuartut pisinnaasaat pisariaqartitaallu aallaavigalugit.

Killiffimmi naalakkersuineramik suliaqartut tungaanniit meeqqat atuarianni ilinniagassanut pilersaarutit ilinniarnikkullu anguniagassat iluarsateqqinneqarnissaat akuersissutigineqarpat pissusissamisussaaq nalilersueqqissalluni qanoq iliorluni inuit pisinnaatitaaffiisa meeqqallu pisinnaatitaaffiisa ilinniartitsissutigineqarnerattaq meeqqat atuarianni ilinniagassani ilinniagassaqaqfinnilu ilinniartitsinermut ilanngunneqassanersoq.

**Apeqqut 6:** Qupperneq 155. Inuttut pisinnaatitaaffiit aaqqissuusseqqinnissami aallatereersumi ilinniartitsisunngornianut atuartitsissutigineqarnissaat nakussassarniarlugu suliniuteqassasut, tamatumani ilanngullugu ilinniartut Kalaallit Nunaanni meeqqat atuarianni oqartussaasutut inissisimanissaannut annertunerusumik piareersartillugit.

**Apeqqut 7:** Qupperneq 155. Meeqqat atuarianni ilinniartitsisut lektorillu ilinniartitsisunngorniarluni ilinniarfimmittut atuartut inuttut pisinnaatitaaffinik atuartinnissaannut naleqquttunik piginnaasaqalernissaat suliniutigissagaat, tamatumani pingaartumik Naalagaaffiit Peqatigiit Meeqqat pillugit isumaqatigiissutaat aamma Naalagaaffiit Peqatigiit Innarluutillit pillugit isumaqatigiissutaat eqqarsaatigalugit. Tamanna periarfissaqarpat pisinnaavoq maannakkut ilinniartitsisuusut atuariillu pisortaasa ilinniaqqinneranni.

**Apeqqutinut 6-imut aamma 7-imut akissut:** Ilinniartitsisussat ilinniartitaanerannut ilinniagassat aaqqissuussaaneranni nutaami 2018-imeersumi ilinniarnarup immikkoortortaani 4-mi ilinniaqatigiinnut piffissaliussat arfineq aappaanni "Eqqarsaqqissaarneq, ileqqorissaarneq aamma upperisarsiorani nunarsuarmik qimerluuinerni" inuit pisinnaatitaaffii aamma meeqqat pisinnaatitaaffii ilaapput.

**Apeqqut 8:** Qupperneq 157. Inuttut pisinnaatitaaffiit ilinniagaqarlutik sulisut ilaasa, soorlu ilinniartitsisut, perorsaasut, isumaginninnermi siunnersortit isumaginninnermi perorsaasut, naalagaaffik sinnerlugu sulisartut inuttut pisinnaatitaaffiit pillugit atuartinneqarnerat qanoq annertutiginersoq pitsaatiginersorlu paasiniassagaat, taamatullu atuartitsinerup aaqqissuusaaqsumik siunissami ilinniartitaanernut pilersaarusianni ilaanissaa isumaliutigissagaat.

**Akissut:** Naalakkersuisut Kalaallit Nunaanni ilinniartitaanerit ingerlaqqiffiusut tamaasa suleqatigalugit pitsaanerulersitsiniarluni suliniutit aallartinnikuuaat. Taamatut

pitsaanerulersitsiniarluni suliniutigineqartut kingunerissavaat ilinniartitaanerit nangeqattaartumik ingerlaavartumik nalilersorlugit misissuiffigineqartarnerat.

**Apeqquut 9:** *Qupperneq 157. Naakkersuisuni, kommunini oqartussanilu allani atorfillit tamarmik inuttut pisinnaatitaaffiit pillugit ilinniartinneqartarneranni inuttut sulinerminnilu pisinnaatitaaffinnik naleqquttunik ilaatitsisarnissaat suliniutigissagaat.*

**Akissut:** Naalakkersuisut inuit pisinnaatitaaffii pillugit apeqquutit Inuit pisinnaatitaaffiinut Institutimut ingerlaavartumik oqaloqatiginnissutigisarpaat. Taamaammat Namminersorlutik Oqartussani, kommunini oqartussaaffeqarfinnilu allani sulisut inuit pisinnaatitaaffiisa ilinniartitsissutigineqarnissaannik pisariaqartitsinerat aammattaaq ingerlaavartumik nalilersuiffigineqartarpoq.

**Apeqquut 10:** *Qupperneq 166: Qularnaassagaat Ilinniarfissuarmi ilinniartitsisunngorniarnep aaqqissuussaannermigut imarisamigullu pisariaqartitaminik pissarsinissaa, ilinniartitsisut qaffasissumik piginnaasallit ilinniartitaasalerniassammata ilanngullugulu meeqqat immikkut ittunik pisariaqartitallit atuartaanerisa isumaginissaanut aaqqissuunnissaanullu isumaginnissinnaaneq.*

**Akissut:** Ilinniartitsisut ilinniartitaanerannut ilinniagassat aaqqissuussaanneranni nutaami 2018-imeersumi immikkuullarissumik perorsaariaaseq ilinniagassaqaarfittut nutaatut ilanngunneqarpoq. Ilinniartut tamarmik ilinniagaasat aaqqissuussaannerat nutaaq malillugu immikkuullarissumik perorsaariaatsimik sukumiisumik ilinniartinneqartassapput. Ilinniagassat atuutilersinneqarput ilinniartitsisut tamarmik atuartunik immikkut ittunik pisariaqartitsisunik ilinniartitsisinnaassagunik suliamut tunngasunik aamma perorsaannermi ilinniartitseriaatsinik anguniagaasunillu pisariaqartinneqartunik periarfissaqalernissaat qulakkeerniarlugu.

**Apeqquut 11:** *Qupperneq 166: Ilinniarfeqarfinni internettikkut attaveqarnermik pilersitsillutillu pitsanngorsaassasut taamatullu aamma internettikkut attaveqarnerup innuttaasunut tamanut periarfissaalernissaanut suliniuteqarlutik, tamatumuunalu ilinniartitsisunik atuartunillu ungasianiit atuartitsisinnaanermut periarfissat annertunerulersillugit.*

**Akissut:** Nuna tamakkerlugu digitaliseeriinermi iloriusissat 2018-2021, webadressemi uani atuarneqarsinnaapput;

DK - <https://digitalimik.gl/da/Digitaliseringsstrategi>

KAL - <https://digitalimik.gl/kl-GL/Digitaliseringsstrategi>

Iloriusissat sammisassanut arfinilinnut agguarneqarsimapput pingaartumillu sammisassaq 1 ((Innuttaasoq qarasaasiarsortoq) aamma sammisassaq 3 (Qarasaasialerinemik paasisimasaqarneq) innuttaasut internetimik atuisinnaanerannik aamma Naalakkersuisut innuttaasut internetimik atuinerannik annertunerusumik nukittorsaaniissamut iloriusissiaannik sammisaqarfiupput.

**Apequt 12:** Qupperneq 166: Suliniutinik annertunerusunik aallartitsissasut ilinniartitsisut ilinniarsimasut illoqarfinni minnerniikkusulernissaannut nunaqarfinniikkusulernissaanullu, tamakkunaneereersullu tigummiinnarnissaannut kajumissisitsinissaq anguniarlugu, soorlu assersuutigalugu nunaqarfiit illoqarfiillu akornanni peqatigiinnernik imaluunniit ilinniartitsisutigut paarlaasseqatigiittarnissamik aallartitsinikkut misilittakkanik avitseqatigiittarnissaq anguniarlugu.

**Akissut:** Immikkoortoq taanna kommunit susassaqafigaat. Illoqarfinni mikinerusuni nunaqarfinnilu ilinniartitsisunik ilinniarsimasunik sulumallersitsinissamut sulisorinniinnarnissamullu tunngatillugu kommunit iliuuserisartagaat qitiusumiit sunniuteqarfigineqartanngillat.

**Apequt 13:** Qupperneq 166: Ilaatigut perorsaanermi suliniutit immikkut ittit aallartinneqarfigit meeqqallu atuartut angerlarsimaffianniittut tapersorsornerisigut meeqqat atuartut angerlarsimaffianniittut ilaqutaasalu atussuteqarnerat taperserniarlugu suliniutinik aallartitsissasut.

**Akissut:** Immikkoortortaq taanna taamatuttaaq kommunit susassaqafigaat. Ilassutigineqassaaq Naalakkersuisut atuartut ineqarfiini pissutsit pitsaanerulersinneqarnissaat kissaatigimmassuk. Taamaammat 2017-imi Inatsisartut meeqqat atuariat pillugu inatsisip allanngortinneqarnissaa akuersissutigaat taamaalillutik Naalakkersuisut siunissami ilinniartut atuartut ineqarfiiniittarnerat ilinniartullu ineqarfiiniittarnerat pillugit malittarisassanik erseqqinnerusunik aalajangersaasalersinnaassammat, taamatuttaaq atuartut ineqarfiisa ilinniartullu ineqarfiisa illutaasa aamma perorsaanermut tunngatillugu imarfisaasa minnerpaamik piumasaqaatitassaannut tunngatillugu. Tamakkununga tunngasut sulissutigineqarnissaasa aallartinneqarnissaat siunertarlugu 2018-imi atuartut ineqarfiinut killiffimmik nalunaarusiortoqarpoq ineriartortitsiniarluni sulissutigineqartussanut suliassanullu allanut siunnersuutitalimmik. Nalunaarusiaq kaammattuutigineqartullu 2019-ip aallartisialernerani tamakkuninnga suliaqarlutik attuumassuteqartunut oqaloqatiginnissutigineqassapput kommunit naalakkersuisoqarfiillu allat suleqatigalugit pilersaarutinik aalajangersimasunik sulissutigisassanillu suliaqartoqarnissaa siunertarlugu.

**Apequt 14:** Qupperneq 168: Unitsitsiinnartarneq, tamatumunngalu peqquataasut ataatsimut isigalugit, paasissutissanik katersillutillu ataavartumik saqqummiussisassasut.

**Apequt 15:** Qupperneq 168: Inuussutissarsiummik ilinniarfiit naliliiffigissagaat, ilinniartitaanermik naammassinninnissamut aporfiit ilinniarfinniittut paasiniarlugit.

**Apequt 16:** Qupperneq 168: Kalaallit Nunaanni praktikkerfissat amerlanerulernissaat anguniarlugu ilungersuuteqarnerulissasut, tamatumani ilanngullugit atuariat

*suliffeqarfiillu akornanni assersuutigalugu peqatigiinnernik pilersitsinerit imaluunniit isumaqatigiissutini immikkut piumasaqaasiornikkut assigisaasigulluunniit.*


**Apeqqutinut 14, 15 aamma 16-imut akissutit:** Inuussutissarsiutinut ilinniartitaanerni unitsitsiinnartarnerit suliffinnillu misiliiffissanik amigaateqarneq pisarissersornartuupput kaammattuuteqarnernilumi sulissutigeqqinniarneqarput.

Ilaatigummi Namminersorlutik Oqartussani suliassaqarfiit assigiinngitsut suleqatigiinnerulernissaat sulissutigineqalerpoq, paasissutissanik katersisarneq pitsaanerulersinneqarnissaa, Majoriap naliliiffigineqarnissaa ilitersuisarnerlu tassani sammineqarlutik.

Aammattaaq suliffeqarfiit pisortanilu oqartussaasut ilinniartunik suliffinnillu misiliisunik atorfinitsitsineranni inuiaqatigiinnut akisussaassuseqarneq pillugu Inatsisartut inatsisissaattut siunnersuummi tamakku nangillugit suliarineqarput.

Tamakkua saniatigut ataqatigiissumik eqaatsumillu ilinniartitsinermi periaaseqalernissaq pillugu ilinniartitaanermut tunngassuteqartuni naliliisarluni misissuinermik ineriartortitsinermillu suliniutigineqartut suliareqqinneranni uniinnartoqartannginnissaa annertuumik sammineqarpoq.

Inussiarnersumik inuulluaqqusillunga



Ane Lone Bagger